

खबरां

1. प्रधानमंत्री नरेंद्र मोदी होरें नमीं दिल्ली च साइप्रस दे राष्ट्रपति निकोस क्रिस्टोडौलाइड्स हुंदे कन्नै मीटिंग लाई। श्री मोदी होरें आखेआ- भारत ते साइप्रस दा लक्ष्य अगले 5एं बरें च निवेश गी दूना कने दा ऐ।
2. चुनांS आयोग नै 10एं राज्यें दिएं 24एं राज्यसभा सीटें लेई 2 बरें मगरा होने आहले चुनाएं दी घोशणा कीती, मतदान 18 जून गी होडना।
3. उच्चतम अदालत नौमी जमात लेई 3 भाशें च पढना पैहली जुलाई थमां लाजमी करने दे सी.बी.एस.ई दे फैसले खलाफ दायर याचिका पर अगले हफते सुनवाई करोग।
4. भारती मौसम विभाग नै कल उत्तर प्रदेश, मध्य प्रदेश ते विदर्भ च सख्त गर्मी दी लैहर दे इमकान गी दिखदे होई रेड अलर्ट जारी कीता ऐ।
5. ते आई.पी.एल क्रिकेट च सनराइजर्स हैदराबाद दा मुकाबला अज्ज संझा हैदराबाद च रायल चैलेंजर्स बेंगलुरु कन्नै होग।

<><><><><><>

Ind-Cyprus

भारत ते साइप्रस नै अज्ज आतंक रोधी नवाचार ते प्रौद्योगिकी उच्च शिक्षा ते अनुसंधान ते सांस्कृतिक सहयोग पर संयुक्त कार्य समूह दी स्थापना समेत बक्ख-बक्ख क्षेत्रें च केई समझौते कीते। प्रधानमंत्री नरेंद्र मोदी होरें नमीं दिल्ली च साइप्रस दे राष्ट्रपति निकोस क्रिस्टोडौलाइड्स हुंदे कन्नै बक्ख-बक्ख खेड्डें च दपक्खया मंचें पर सहयोग समेत खेत्तरीय ते वैश्विक महत्वै आहले मुद्दें पर बी बचार बटांदरा कीता। प्रधानमंत्री मोदी होरें सांझे सांझे बयान च आखेआ जे भारत ते साइप्रस मझाटै मित्री न छडी मजबूत ऐ, सगुआं भविक्ख गी ध्यानै च रक्खियै तोड चाढी जा'रदी ऐ। उनें आखेआ जे पिछले 1 दाहके च साइप्रस आसेआ भारत च कीता जाने आहला निवेश दूना होई गेआ ऐ। साइप्रस भारत च सब्भनें शा मता निवेश करने आहले 10एं मुल्लें च शामिल ऐ। दौनें मुल्लें मझाटै आपसी विश्वास बधेया ऐ। भारत-यूरोपियन यूनियन मुक्त बपार समझौते थमां होर मतियां संभावनां बनियां ना। उनें आखेआ जे अगले 5एं बरें च इस निवेश गी फही दूना करने दा लक्ष्य मिथा'रने आं। प्रधानमंत्री होरें आखेआ जे पिछले किश बरें च साइप्रस कन्नै रक्षा सहयोग बधेया ऐ ते दौनें मुल्ले यूक्रेन ते पच्छिम एशिया संघर्ष गी तौले खतम करने ते शांति दिएं कोशशें दा समर्थन करदे ना। साइप्रस दे राष्ट्रपति होरें आखेआ जे पिछले 1 बरे च दौनें देशें दे आपसी सरबंध ते यूरोपीय संघ ते भारत दे सरबंधें च बडी मती बेहतरी आई ऐ।

<><><><><><>

ECI-RS Biennial Polls

भारती चुनां आयोग नै अज्ज 10एं राज्यें दिएं 24एं विधानसभा सीटें लेई दो-दो बरें मगरा होने आहले चुनां कार्यक्रम दी घोशणा कीती। साबका प्रधानमंत्री एच.डी देवगोडा, केंद्री मंत्री जार्ज कुरियन ते रवनीत सिंह समेत केइए सदस्यें दा राज्यसभा दा कार्यकाल अगले म्हीने पूरा होआरदा ऐ। इनें सीटें च आंध्र प्रदेश, गुजरात ते कर्नाटक दियां 4, राजस्थान ते मध्य प्रदेश दियां 3, झारांड दियां 2 ते मणिपुर, मेघालय, अरुणाचल प्रदेश ते मिजोरम दी 1-1 सीट लेई चुनां होग। अधिसूचना पैहली जून गी जारी कीती जाह्य ते मतदान 18 जून गी होग। वोटें दी गिनतरी बी उसै रोज कीती जाह्य।

<><><><><><>

Keralam Speaker

केरलम च सत्त बारी दे कांग्रेस विधायक तिरुवनचूर राधाकृष्णन होरेंगी इक ऐतिहासिक त्रैकोणी मकाबले च 16मीं केरल विधानसभा दा अध्यक्ष चुनी लैता गेआ ऐ। विधानसभा दे इतिहास च पैहली बारी इस चुनांS च

सत्ताधारी यूडीएफ, वाम दल ते बीजेपी दे नेतृत्व आहले राश्ट्री जनतांत्रिक गठबंधन दे मेदवार मैदान च हे। सत्ताधारी यूडीएफ दे मेदवार वनचूर राधाकृष्णन होरें'गी 140एं चा 101 वोट हासल होए जिसलै के बरोधी धडे एलडीएफ दे मेदवार ए.सी. मोइदीन होरें'गी 35 वोट ते बीजेपी दे मेदवार बी.बी. गोपाकुमार होरें'गी छडे 3 गै वोट थहोए। नेहा पैहली बारी ऐ जिसलै बीजेपी ने केरलम् विधानसभा च स्पीकर दे औहद्धे लेई चुनांऽ लडेआ ऐ। विधानसभा दे उप-स्पीकर हुं'दे औहद्धे लेई चुनांऽ पैहली जून गी होग।

<><><><><><>

PM-Council of Min

प्रधानमंत्री नरेंद्र मोदी होरें कल नमीं दिल्ली च मंत्रीमंडल कन्नै लाई गेदी मीटिंग दी अध्यक्षता कीती। इक सोशल मीडिया पोस्ट च श्री मोदी होरें आखेआ जे मीटिंग दरान विकसित भारत तैहत सखल्ले जीन ते सखल्ले बपार दे इक सांझे सुखने गी सच करने बारै कीते जा'रदे हीलें पर बचार-बटांदरा कीता।

<><><><><><>

PM-MKB

प्रधानमंत्री नरेन्द्र मोदी होर इस म्हीने दी 31 तरीक गी आकाशवाणी थमां "'मन की बात" कार्यक्रम च इक्क बारी परतियै अपने बचार सांझे करडन। एहू इस मासिक रेडियो कार्यक्रम दी 134मीं कडी होग। श्रोता टोल-फ्री नंबर 1800-11-7800 पर कार्यक्रम आस्तै अपने बचार ते सुझाऽ भेजी सकदे न। एहू सुझा नरेन्द्र मोदी ऐप या मायगाँव ओपन फोरम राएं बी दिते जाई सकदे न। तुस 1922 पर मिस्ड कॉल देइयै ते एस.एम.एस. थमां हासल लिंक थमां बी सिद्धे प्रधानमंत्री होरें'गी सुझा भेजी सकदे न। सुझा 29 तरीक तगर स्वीकार कीते जाडन।

<><><><><><>

SC-New CBSE Policy

उच्चतम अदालत पैहली जुलाई थमां नौमी जमातै च पढने आहले विद्यार्थियों लेई 3 भाशें गी पढना लाजमी करने दे सी.बी.एस.ई दे फैसले गी चुनौती देने आहली याचिका पर अगले हफ्तै सुनाई करोग। सीनियर एडवोकेट मुकुल सूर्यकांत हुंदी अध्यक्षता आहली ते न्यामूर्ति जाय माल्य बागची ते विपुल एम. पंचोली हुंदी पीठ अगरे एहू मामला पुट्टेआ। उनें आखेआ जे एहू जनहित याचिका विद्यार्थिं, उस्तादें ते माता-पिता आसेआ दायर कीती गेदी ऐ।

<><><><><><>

Delhi-Court

दिल्ली दी इक अदालतै आई.आर.सी.टी.सी होटल घोटाले कन्नै जुडे दे कथित काले धनै गी जायज बनाने आहले मामले च राश्ट्री जनता दल प्रमुख लालू प्रसाद यादव हुंदे परिवार दे जीएं ते दुए लोकें खलाफ आरोप तय करने दा फैसला 9 जून तगर टाली दित्ता ऐ। इस मामले दी जांच प्रवर्तन निदेशालय करा'रदा ऐ ते एहू केंद्री अन्वेंशन ब्यूरो आसेआ दर्ज इक मूल अपराध पर आधारित ऐ।

<><><><><><>

High Court Umar Khalid

दिल्ली उच्च अदालतै नै अज्ज उमर खालिद गी 2020 बरे दे उत्तर पूर्वी दिल्ली दंगें च कथित बड्डी साजिश कन्नै जुडे दे गैर कनूनी गतिविधिं दी रोक आहले अधिनियम यू.ए.पी.ए मामले च 3 दिनें दी अंतरिम जमानत दित्ती ऐ। न्यामूर्ति प्रतिभा एम.सिंह ते न्यामूर्ति मधु जैन हुंदी खंडपीड नै उनेंगी पैहली जून थमां 3 जून तगर सख्त शर्तें कन्नै रिहा करने दी इजाजत दित्ती। खालिद नै अपने मरहूम चाचे दे चलिए च शामिल होने ते अपनी मां दे आपरेशन दरान उंदी दिक्खभाल करने लेई 15एं दिनें दी अंतरिम जमानत मंगी ही।

<><><><><><>

Quad Foreign Ministries

क्वाड विदेश मंत्रिं ऐ दी बैठक 26 मई गी नमीं दिल्ली च होग। विदेश मंत्री डाक्टर एस. जयशंकर हुंदे साद्दे पर आस्ट्रेलिया दे विदेश मंत्री पेनी वॉंग, जपान दे विदेश मंत्री तोशिमित्सु मोटेगी ते अमरीका दे विदेश मंत्री मार्को रूबियो बैठक च शामिल होंगन। विदेश मंत्रालय नै दस्सेआ जे इकमुक्त ते खुल्ले हिंद प्रशांत क्षेत्र लेई क्वाड दी सोच मूजब क्वाड विदेश मंत्री पैहल आहले सेक्टरें च सहयोग बधाने पर विचार सांझे करडन ते क्वाड तैळत कीती गेदी

प्रगति दी समीक्षा करंगना। भारत दी यात्रा पर खाना होने शा पैहलें अमरीका दे विदेश मंत्री मार्को रूबियो होरें भारत गी इक महान भ्याल दस्सदे होई आखेआ जे इस यात्रा दरान उनेंगी क्वाड देशें दे बदेश मंत्रिण कन्नै मलाटी करने दा मौका थहोग।

<><><><><><>

IMD

मौसम विभाग ने उत्तर प्रदेश, मध्य प्रदेश ते विदर्भ च कल्लै धोड़ी जबरदस्त लू चलने दा रेड अलर्ट जारी कीता ऐ। दिल्ली, हरियाणा ते चंडीगढ़ च लू दा ऑरेंज अलर्ट जारी कीता गेआ ऐ। अगले द'उं दिनें दरान बिहार, छत्तीसगढ़, ओडिशा, पंजाब, राजस्थान, तेलंगाना ते आंध्र प्रदेश च बी लू चलने दी शैंका है। पच्छिम बंगाल दे गंगा कन्नै लगदे इलाकें सने ओडिशा च कल्लै तगर गर्म ते उमस भरोचा मौसम रेही सकदा ऐ। दिल्ली, हरियाणा, चंडीगढ़, उत्तर प्रदेश ते विदर्भ च रातीं दा मौसम गर्म रौहने दे असार ना। पंजाब ते पच्छमी राजस्थान च किश थाहें पर धूड भरोची अंधी चलने दी बी शैंका ऐ। पूर्वोत्तर, पच्छमी बंगाल दे तराई आहले इलाकें ते दक्खनी अंदरूनी कर्नाटक दे किश हिस्सें च कल्लै तगर तेज बरखा बरी सकदी ऐ। अगले द'उं दिनें च अंडमान ते निकोबार टापुएं सने झारखंड, केरल, माहे, लक्षद्वीप, पुद्दुचेरी ते कारईक्काल च बिजली मिलकने, तेज हवा चलने ते गरज दे कन्नै बरखा होने दी भविष्यवाणी बी कीती गई ऐ।

<><><><><><>

HP Weather

हिमाचल प्रदेश च अज्ज बडुलै थमां केई सारी थाहें पर रुकी-रुकियै बरखा होआ करदी ऐ। मौसम दे इस बदलाव करी लोकें गी जबरदस्त गर्मी थमां राहत थहोई ऐ। राज्य दे केई सारे जिलें जि'आं शिमला, चम्बा, कांगड़ा, कुल्लु, हमीरपुर ते लाहुल-स्पीती च हौली बरखा बरी ऐ। मौसम विभाग दे शिमला केन्द्र मूजब पच्छमी ब्हाएं च खौदल करी मौसम च एहू तब्दीली दिक्खी जा'रदी ऐ। मौसम विभाग ने कुल्लु, शिमला, चम्बा, ऊना, हमीरपुर, मंडी ते बिलासपुर च अगले 48एं घैंटे दरान भारी बरखा दा आरेंज अलर्ट जारी कीती ऐ।

<><><><><><>

School-Magazine

जम्मू-कश्मीर दे सरकारी हायर सेकेंडरी स्कूल सरोर नै अज्ज अपनी पैहली-पैहली स्कूल पत्रिका blessings जारी कीती। इस पत्रिका दा विमोचन स्कूली शिक्षा विभाग दे कमीशनर सैक्रेटरी राम निवास शर्मा होरें कीता जेडे इस समारोह दे मुख परौहने हे जिसलै के स्कूली शिक्षा विभाग जम्मू दे डरैक्टर डा. नसीम जावेद चौधरी मानजोग परौहने हे। मुख शिक्षा अधिकारी जम्मू श्री अजीत कुमार शर्मा होरें चेचे परौहने दे तौर पर प्रोग्राम च शिरकत कीती। इस मौके पर रंगारंग सांस्कृतिक प्रोग्राम दे अलावा बूहटे-पौधे लाने आहली मुहिम, नशा-मुक्ति अभियान, महिला सशक्तिकरण ते ठोस रैंद-खैंद दे प्रबंधन पर आधारित प्रोग्राम करोआए गे। मौजूद शिक्षकें ते प्रिंसीपलें गी संबोधित करदे होई श्री राम निवास शर्मा होरें स्कूल आसेआ शुरू कीती गेदिण पैहलकदमिण लेई प्रिंसीपल राबिया बातूल हुंदी बड़ी मती सराहना कीती।

<><><><><><>

IPL-Cricket

आई.पी.एल क्रिकेट च सनराइजर्स हैदराबाद दा मुकाबला रायल चैलेंजर्स बेंगलुरु कन्नै हैदराबाद च होग। मैच हुनै थमां बस थोडे चिरें थमां शामी साहु 7 बजे शुरू होग। एहूदे शा पैहलें गुजरात टाइटन्स नै जंदी रातीं अहमदाबाद दे नरेंद्र मोदी स्टेडियम च चेन्नई सुपर किंग्स गी 89 रन कन्नै हराया।

<><><><><><>

Badminton

मलेशिया मास्टर्स च भारती शटलर अशिमता चलीहा, साबका यूरोपीय चैंपियन डेनमार्क दी लाईन जेसफेल्ड थमां महिलाएं दे इक्कले-इक्कले आहले क्वार्टफाइनल्स च हारियै खेडुं थमां बाहर होई गई ऐ। चलीहा दे बाहर होई जाने करी बीडब्ल्यूएफ सुपर 500 टूर्नामेंट च भारत दी चुनौती बी खत्म होई गई ऐ। चलीहा, चिडी-छिक्के दी रैंकिंग च

71मीं थाहै पर ऐ। उन्नै शुरूआती खेडू जित्तेआ पर मगरा 61एं मिंटे च 23मीं थाहै आहली खडारन थमां 23-21, 18-21, 11-21 कन्नै हारी गई।

<><><><><><>

HM Smart Border Project

गृह मंत्री अमित शाह होरें आखेआ ऐ जे सरकार देशै दे बन्नै गी होर मता सुरक्षित बनाने लेई स्मार्ट बॉर्डर परियोजना शुरू करग। नमीं दिल्ली च अज्ज सीमा सुरक्षा बल- बीएसएफ दे अलंकरण समारोह च श्री शाह होरें आखेआ जे इस परियोजना च ड्रोन, रडार, कैमरें ते होरनें तकनीकी संसाधनें दा इस्तेमाल शामिल होग। उंनें आखेआ जे स्मार्ट बॉर्डर कॉन्सेप्ट दे तैह्त बीएसएफ दी सुरक्षा प्रणाली च तकनीकें गी संगठित करियै अगले इक बरै दे अंदर बन्ने दी सुरक्षा आह्ला इक ऐसा ढांचा विकसित कीता जाह्ग जिसे पार करी सकदा दुश्मन लेई नामुमकन होग। गृह मंत्री होरें आखेआ जे अंतरराष्ट्री बन्नै दी सुरक्षा कन्नै जुडी दिएं चुनौतियें गी व्यापक इलाकाई जिम्मेदारी दे रूपै च दिक्खेआ जाना लोडचदा ऐ। श्री शाह होरें आखेआ जे केई चुनौतियें दे बावजूद बल ने लगातार राष्ट्र दा गौरव बनाई रक्खेआ ऐ। उंनें घुसपैठ, नशीले पदार्थे दी तस्करी, नकली करंसी दे चलन ते थेहारें ते ड्रग्स दी तस्करी सने उभरदे सुरक्षा खतरें दा जिक्र कीता। गृह मंत्री होरें गलाया जे बीएसएफ ने 1965 च 25 बटालियनें ते सीमित संसाधनें दे कन्नै शुरूआत कीती ही पर अज्ज लगभग 2 लक्ख 70 ज्हार कर्मियें दी गिनतरी दे कन्ने हुन एहू बन्नै दी राक्खी करने आह्ला दुनिया दा सबनें शा बड्डा बल बनी गेआ ऐ। श्री शाह होरें आखेआ जे सरकारै बीएसएफ दे अधिकार खेत्तर गी 15 किलोमीटर थमां बधाइयै 50 किलोमीटर करी दिता ऐ। उंनें गलाया जे सरकारै इब्बी फैसला लैता ऐ जे घुसपैठ पर रोक लाइयै हर इक घुसपैठिये गी देशै थमां बाहर कड्डेआ जाह्ग।

<><><><><><>

Jitendra Chandrayaan

अंतरिक्ष मैहकमे दे केंद्री राज्यमंत्री डाक्टर जीतेन्द्र सिंह होरें अमरीका एयरोनाटिक्स ते एयरोनाटिक्स संस्थान पासेआ भारत दे चंद्रयान-3 मिशन गी 2026 आले 00 अवार्ड कन्नै सम्मानित कीते जाने पर खुशी जाहर कीती ऐ। सोशल मीडिया दी इक पोस्ट च डा. सिंह होरें आखेआ जे चंद्रयान-3 मिशन नै स्हाढे देशै दा मान बधाना बरोबर जारी रक्खे दा ऐ। उंनें आखेआ जे चन्न दे दक्खनी ध्रुव पर ऐतिहासिक साफ्ट लैंडिंग लेई इस मिशन गी सब्भनें शा उच्चा सम्मान थ्होना, भारत दी काबलियत ते समर्थ गी दर्शादा ऐ।

<><><><><><>

WB-CM Prez.

पच्छिम बंगाल दे मुख्मंत्री सुभेदु अधिकारी होरें अज्ज राष्ट्रपति भवन जाइयै राष्ट्रपति द्रौपदी मुर्मू हुंदे कन्नै मलाटी कीती। सुभेदु अधिकारी रक्षा मंत्री राजनाथ सिंह होरें गी बी मिले। मगरा सोशल मीडिया दी इक पोस्ट च राजनाथ सिंह होरें आखेआ जे सुभेदु होर समृद्ध राजनीतिक ते विधायी अनुभव आली शख्सियत न ते उनेंगी मेद ऐ जे ओहू पच्छिम बंगाल गी नमीं उंचाइएं धोडी लेइयै जाडन।

<><><><><><>

Pregabalin She H1 Drug

केन्द्री सेहत मंत्रालय ने प्रेगाबालिन दवाई गी औशधि नियम दी अनुसूची एच1 च शामिल करने दी अधिसूचना जारी कीती ऐ। एह्दे'नै नियम मजबूत होग ते युवाएं च एह्दे माडे इस्तेमाल गी रोकेआ जाई सकग। एहू फैसला किश राज्यें च प्रेगाबालिन दे माडे ते गलत इस्तेमाल दे मद्देनजर लैता गेआ ऐ। एहू दवाई परानी पीड, नसें सरबन्धी विकारें ते नेही होरनें स्थितियें दे इलाज लेई निर्धारित ऐ, ब एह्दी आदत ते एह्दा इस्तेमाल गलत तरीके कन्नै कीता जा'रदा ऐ। मंत्रालय दे मताबक देशै दे किश हिस्सें च गैर-कनूनी तौर पर भंडारित ते गैर-अधिकृत तौर पर बेची गेदी प्रेगाबालिन दी खेप जव्त कीती गई ऐ। संशोधित वर्गीकरण दे मताबक, प्रेगाबालिन दी बिक्री छडे पंजीकृत डाक्टरी थमां जारी वैध पर्ची दी बिनाहू उप्पर गै कीती जाई सकदी ऐ।

<><><><><><>